

Misy banga hofenoina hoe ? Hain'Andriamanitra izany !

Iray amin'ireo olana goavan'ny olombelona ny fahatsapany fa misy banga ao anatiny ary manana faniriana lalina tiany hotanterahina izy, kanefa tsy hainy ny fiavian'izany mazàna. Mikiky azy io, ary katsahiny fatratra izay fomba rehetra hamenoana azy. Azo atao ny mandà an'Andriamanitra, saingy tsy mety fa mitoetra mandrakariva kosa io fahatsapana fahabangana io. Ary matetika, mba handosirana io zava-misy io, dia mirona amin'ny fidorohana zava-mahadomelina ny olona, mamono eritreritra amin'ny fanaovana asa be dia be, amin'ny fanarahana an-jambany filôzôfiaisan-karazany sy fampianarana samihafa hampivelarana ny tena..

Ahoana no hamenoana an'io banga io ?

Ho famenoana an'io banga io, dia misy mihitsy vonona ny hanolo-tena hivavaka amin'ny devoly, hamono tena, na hanaraka olona iray izay omeny ny toerana tokony ho an'Andriamanitra irery. Ao koa ireo vonona ny hiady hahazoana izao tontolo izao noho ny faniriana mafina ho tonga andriamanitra kely. Izay tsy mahita an'Andriamanitra ivelan'ny tenany dia mitady izany ao anatiny. Tsy misy

dikany anefa ny fiainana tsy misy an'Andriamanitra, toy ny sambo iray tsy misy familiana, atopatopan'ny onjan-dranomasina misafoaka sy rivotra misafotofoto etsy sy eroa. Izao anefa, mihanjahanja eo imason'Andriamanitra ny olombelona. Mandinika azy Izy ary mahalala ny hetahetan'ny fanahiny. Tsy Izy ve no nahary azy ? Izany no antony nanomezany ny olona ny fomba ahitàna Azy.

Andriamanitra irery no afaka mameno an'io banga io

Eny, **Andriamanitra dia afaka mameno sady te hameno ny banga** ao anatinao : "Ary ny firenena rehetraavy amin'ny iray ihany dia namponeniny ambonin'ny tany rehetra, ary efa notendreny ny fotoan'andro sy ny farity ny fonenany, mba hitady an'Andriamanitra izy, raha tähiny hahatsapa ka hahita Azy, kanefa tsy mba lavitra antsika rehetra Izy" (Asa 17.26-27). Eny, tsy lavitra antsika tokoa Andriamanitra. Ny zavatra rehetra manodidina antsika dia manaporofa fa eo Izy, satria Izy "dia Andriamanitra Izay nanao izao tontolo izao sy ny eo aminy rehetra, Izy no Tompon'ny lanitra sy ny tany" (Asa 17.24). Vonona ny hikarakara anao sy hamaly ny hetahetam-ponao Izy. Hoy i Jesoa Tompontsika hoe : "Mankanesa aty Amiko ianareo rehetra izay miasa fatratra sy mavesatra entana, fa Izaho hanome anareo fitsaharana. Ento ny ziogako, ka mianara

Amiko, fa malemy fanahy sy tsy miavona ampo Aho; dia hahita fitsaharana ho an'ny fanahinareo ianareo" (Matio 11.28-29). Tamin'ny alàlan'i Jesoa no nanambaràn'Andriamanitra ny tenany tamin'ny olona teto an-tany. Tonga olombelona Izy mba hanatonany antsika: i Jesoa Kristy dia Andriamanitra tonga nofo ary niara-nonina tamintsika. Na teo aza anefa izany, dia hita mandrakariva fa manana toetra mpiodina, tsy mpankatò, tsy hay fehezina ary tsy mahatanty an'Andriamanitra ny olombelona.

Porofon'izany: nankahalainy tsy amin'antony ny Tompo Jesoa. Niray tetika izy ireo ary nifanaraka ny hamono Azy tamin'ny fanomboana Azy teo amin'ny hazofijaliana, mba hampanginany ilay feo naneho miharihary ny toetra maha-mpanota azy.

Mihoatra noho ny fahabangana nofenoin'Andriamanitra : fiainana mandrakizay

Inona àry no tianao ?

Ny hamenoan'Andriamanitra ny banga manery anao ve ? Mialafara amin'ny fiainana mandrakizay io lâlana io, ombàn'ny fitahian'Andriamanitra anao lalandava. Sa aleonao ve hijanona ihany amin'izao fahatsapana fahabangana izao, ka hanohy hameno io banga io amin'ny zava-poana, dia amin'ny fahafinaretan'izao tontolo izao, ary

hitoetra lavitra an'Andriamanitra ? Mifara amin'ny helo lavitra an'Andriamanitra sy ny ozona mandrakizay io lalana io.
Dieny izao anefa Andriamanitra dia mameetraka ny fainana eo anoloanao, mba hisafidiananao : "Fiainana mandrakizay no omen'Andriamanitra antsika, ary ao amin'ny Zanany izany fiainana izany. Izay manana ny Zanaka no manana ny fiainana ; izay tsy manana ny Zanak'Andriamanitra no tsy manana ny fiainana" (1 Jaona 5.11-12). **Fidio ny Zanak'Andriamanitra, hahazoanao fiainana** satria te-hamonjy ny olona rehetra Andriamanitra. Vonona ny hanamarina ireo rehetra mibebaka Izy. Fasahisahiana, ary **mampidi-doza** aza, ny manao **ampitso lava** ny fahasoavana atolotra anao anio.

Ry mpamaky malala, fantaro fa tian'Andriamanitra nyahasambatra anao, ary "misy fifaliana eo anatrehin'ny anjelin'Andriamanitra ny amin'ny mpanota iray izay mibebaka" (Lioka 15.10).

FIVAROTAM-BOKY

KRISTIANA

- **Fianarana Baiboly maimaimpoana**
- **Fivarotana boky kristiana amin'ny vidiny mirary**
- **Fampindramana boky kristiana**

ANTANANARIVO

BIBLIOTHÈQUE CHRÉTIENNE MADAGASCAR

Lot IV L 39 D

Anosivavaka Ambohimanarina
101 – Antananarivo

Tel : (+261) 20 23 330 67

Portable : 033 15 552 35

e-mail : bibliothequechretienne@gmail.com

**Misy banga
hofenoina hoe?**

Hain'Andriamanitra izany !